

AGENDRE ADVENT I

MINGGU 01 DESEMBER 2024

1. FANGOWAI BA FOGAONI

(Tedöni dorosi , möi ndra sohalöwö bakha ba gosali, ba lahalö wangahono dödö banua niha Keriso ba wangondrasi ba ba wasumangeta khö Lowalangi).

Fangowai :

SA : Ya'ami banua niha Keriso, Ya'ahowu ami ba döi Zo'aya
Maranata

SATO : Maranata !

SA : Ya faofao khömi Lowalangi...

SATO : Ya fao Khöu Geheha-Nia

Fanunu Lili

SH : *(Möi ba meza Altar zangai huhuo sebua, ba imane)* : “Maökhö andre migu Adefe Si I khöda. Eluaha Adefe si sara andre: “Fa’aro wanötöna ba wombaloï Fa’atohare Zo’aya ba luö safuria”” *(Aefa da’ö, itunu Lili molo’ö migu Adefe)*

Fogaoni :

SA : Da ta’owuawua’ö dödöda wangondrasi Yehowa, da ta’omusoi’ö dödöda ba wamalua fasumangeta khö Lowalangi. Tasuno Ia, manunö ita moroi ba Mbuku Zinunö **numero 34**

34. MASUNO AE NDRA’ UGÖ 1

do = g 4/4

MM = 88 - 96

1. Masuno ae Ndra ’ ugö Yehowa So’ aya.

No Öfatenge khöma Nono-U si ha samösa.

Si no möi salahima wangepa’ ö ba horö.

Solohe fangatulö tou ba gulidanö.

2. He Yesu aine khöma hagaini dödöma.

Haga soroi zorugo fangoroma horöma.

Ma’ andrö khö-U So’ aya atulö’ ö dödöma.

Afu tola matema Ndra’ ugö So’ aya.

2. FANGA’ARO’Ö WA’OWULO (VOTUM)

SA : Da tahonogö dödöda ba wariawösa, ba ba wa hasambua khö Lowalangi, (Muzizio zato):

No owulo ita ba da’e ba döi Lowalangi Ama, ba ba döi nono-Nia Yesu Keriso, ba ba döi Geheha Ni’amoni’ö. Fangorifida ha ba döi Yehowa si no momböi banua si yawa awö danö.....

SATO : YADUHU

SA : Hiza, möi yomo ba mbanua khömi Razomi, Razo satulö ba sabölö.
Maranata.....

SA : **Manunö** : BZ. : 452

Maranata..... Maranata..... Maranata.....

SA : Mangandrö ita :

He Yehowa Lowalangima, somböi banua si yawa awö danö. No fa’ebua dödö-U khöma wa no tola marugi mböröta ndröfi ba wa’aniha Keriso. Abölö’ö ndra’aga Eheha-Mö andrö Ni’amoni’ö, ena’ö so khöma mbuabua wamalalini era’era, ba ena’ö so wa’a, sanöi ba sowua ndra’aga ba wamati ba wamaondragö fa’atohare Zo’aya ya’aga Yesu Keriso. Be’e khöma wehi’a dödö, fangosindruhugö ba fa lö faröi ba wango’aurifagö taroma Li-Mö, ena’ö samonga’eu fa’omasi, fa’atulö, fangepa, ba fa’ohahau dödö ndra’aga fefu irugi we’aso-Mö andrö si mendrua, Yaduhu. **(Mudadao zato)**

3. MANUNÖ moroi ba Mbuku Zinunö Numero 32

32. AHATÖ AE ZO'AYA, 1

do = bes 4/4

MM = 96 - 104

1. Ahatö ae Zo ' aya, Fondrege Zalaŵa.
Sabölö ba sanolo, sameta horöda.
Sahakhö tödö Ia ba niha fefu sa.
Andrö Iröi zorugo wolohe fangefa.
2. Ahatö ae Zo' aya, möi tou ba danöda.
Si no faduhu tödö, zangila Mesia.
Somuso tödö ira wanuno Yehowa.
Hozana wangowaira Fondrege Zalaŵa.

4. FOMBASO TAROMA LI LOWALANGI FAMÖRÖGÖ (AF)

: Da tafondrondrongo daroma Li Lowalangi, tehalö moroi ba zura **II Moze 20:1-17**

1. Ba iwa'ö daroma li andrö fefu Yehowa, imane:
2. Ya'odo Yehowa Lowalangi, si no mangeheta ya'ugö ba danö Miserayi andrö, ba zi no möi sawuyu ami.
3. Böi so khömö Lowalangi tánö bö'ö, baero ndra'o.
4. Böi fazökhi khöu nadu, ba he famaedo hadia ia, he si so si yawa ba mbanua, ba he si so si tou ba guli danö, ba he si so ba nidanö, barö danö.
5. Böi angalulu khönia ba böi fosumange ia, me no Lowalangi solohu ndra'o, ya'odo andre, Yehowa, Lowalangi, sanguhuku horö ndra ama ba ndraono ba ba ma'uwu mitou, khöra si fatiu tödö khögu,
6. ba si hakhösi tödö sangomasi'ö ya'o ba solo'ö oroisagu; irugi hönö nga'ötö.
7. Böi tötoi döi Lowalangi Yehowa ba waya; lö'ö sa zi lö ihuku Yehowa zanötöi töinia ba waya.
8. Ame'egö tödö luu wolombase andrö, ba we'amoni'ö ya'ia.
9. Önö ngaluo mohalöwö ndra'ugö ba öhalö halöwöu fefu.
10. Ba ero fitu bongi, ba luu wolombase khö Lowalangi Yehowa; böi babaya hadia ia halöwö ba da'ö, he ya'ugö, ba he onou matua, ba he onou alawe, ba he sangai halöwö khöu ira matua ba he sangai halöwö khöu ira alawe, ba he uriföu, ba he si fatewu khöu ba mbanuami bakha.
11. Önö ngaluo sa mege khö Yehowa, ba wamazökhi banua si yaw~a, awö danö, awö nasi, awö nösira fefu; ba ba luu si fitu, ba no molombase ia. Andrö wa no ifahawu'ö luu si fitu andrö Yehowa, ba no i'amoni'ö.
12. Fosumange namau, awö ninau, ena'ö anau nosou ba danö, nibe'e Lowalangi Yehowa khöu.
13. Böi ange'e.
14. Böi ohorö.
15. Böi anagö.
16. Böi böbögö khö nawöu zi lö duhu.
17. Böi isö nomo nawöu. Böi isö wo'omo nawöu ba he sangai halöw~ö khönia ira matua, ba he sangai halöwö khönia ira alawe, ba he öróbaonia, ba he kudonia, ba he hadia ia, fefu, nibayabaya nawöu.

Simanö daroma Li Lowalangi, da tatema'ö faoma sinunö: BZ.Numero 3:2

3. MASUNO' Ö YEHOWA

do = f 3/4

MM = 96 - 104

2. Sumange la' ohe khö-U, mala' ika awö niha.
Dozi ira manunö, lasunosuno Yehowa.

Lira lö mo' aetufa, götögötö wa' ara.

5. FANGANDRÖ FANGEFA HORÖ

SA : Ya'ami ira talifusö'

Na tawa'ö lö horöda, ba talimo ita, ba siduhu lö'ö ba dödöda. Na ta'ombakha'ö Horöda, ba lö faröi Ia, ba no satulö Ia,fa'i'efa'ö khöda horö andrö, ihaogö ita, awö wa'iheta fefu zilö atulö. Andrö da möi ita föna Lowalangi si fao fangidengide'ö ba wangombakha horöda, (muzizio ita fefu)

Mangandrö ita :

He Ama Ni'amoni'ö, möiga ma'ondrasi dadaoma wa'ahakhö dödö-U ba wangandrö fangefa horö ba ngawalö nilauma si sökhi. Ma'andrö wa'ebolo dödö-U Ama ba wa'oya golalöwama, ha nifaluama ba ndraonoma, khö ndra satuama, ba talifusöma, ba ba niha fefu. Ma'andrö bologö dödö-U khöma me asese iböbö ndra'aga amuata fa'afökhö dödö, fayawasa, ba fönu ba lala wa'aurima sero ma'ökhö. Ma'andrö hakhösi dödö-U khöma, sasai fefu horöma ba bohouni ndra'aga ba wamaondragö fa'atohare-Mö. Saohagölö Ama, ba döi Zo'aya ya'aga Yesu Keriso, ma'andrö ni'andröma,.....

SATO : Mangandrö ba dödö zamösana föna Lowalangi.....1 irugi 2 meniti.

SA : Hakhösi dödö-U khöma Ama, ba be'e aefa khöma horöma andrö ma'afefu...Yaduhu.

SATO : Manunö : BZ. Numero 224 : 1

224. NA'UBINI'Ö HORÖGU KHÖ YESU

1. Na'ibini'ö horögu khö Yesu, ba lö usöndra za hono dödögu U'ombakha'ö ngawalö horögu, mo lala dödö.

SA : **Turia Wangefa horö** : "Faya wa no sauri Ndra'o, Iwa'ö Yehowa na Omasi-Do mate zebua horö; somasi Ndra'o na iröi lalania andrö sebua horö, na ifalalini gera'erania, ba na auri ia. Mifalalini gera'erami, miröi lalömi andrö, si lö sökhi ! Hana sa wa edöna mate ami, ya'ami ni'omasi'ö-Gu?

LAKHÖMI KHÖ LOWALANGI SI YAWA.....

SATO : Manunö:

450. BA FA'ATULÖ BA GULIDANÖ

do = d 4/4

MM = 74 – 84

1. Ba fa' a tulö ba gulidanö ba niha ni'omasi 'ö andrö

(mudadao zato)

6. FOMBASO TAROMA LI LOWALANGI FÖNA HUHÜO (AB)

: Da tafondrondrongo daroma Li Lowalangi, tehalö moroi ba zura **Yakobo 5:7-11**

7. Ba mibologö dödömi, wombasa, ya'ami ira talifusö, irugi wa'aso Zo'aya. Hiza, ibase'ö mbua danö, sebua böli andrö, sonowi, wamologö tödönia ba khönia, irege itema deu si föföna andrö ba teu safuria.

8. Ba ya'ami göi, ba mibologö dödömi, mibalobaloi, mi'a'aro'ö dödö, noa sa ahatö wa'aso Zo'aya andrö.

9. Böi mi'angaröngarö ba khö nawömi, ya'ami ira talifusö, fa böi tehuku ami; hiza, so moroi sa zanguhuku andrö.

10. Mihalö famaedo ba wanaha famakao ba ba wamologö tödö andrö zama'ele'ö andrö, si no fahuhuo ba döi Zo'aya, ya'ami ira talifusö.

11. Hiza, tafahowuhowu'ō zi no manaha tōdōra. No mirongo wanaha Yobi andrō tōdōnia, ba lualua Zo'aya, ba no mirongo; me no sahakhō sibai tōdō Zo'aya ba sogolō tōdō.

Ya'ahowu zamondrongo taroma li Lowalangi ba same'e ba dōdō.

SA+SATO : Yaduhu

8. FASÖMBATA

SA : Iada'e tebe'e khōda ginötō ba wolohe fasömbata si sambua ni ofulu khō Lowalangi nidōnia'ō Pdt. Pengkhotbah.

Iada'e tebe'e khōda ginötō ba wolohe fasömbata khō Lowalangi. Ta'osamuzaigō wame'e, he fasömbata si föfōna, ba simanō göi zi mendrue awō zi medölu. Ba si föfōna ua da tafondrongo Li Lowalangi me imane:

- ❖ Ba da'ō niwa'ō-Gu: Na so zangatalisi tanömō, ba lö oya'oya ibasi, ba na so zi lö alimagō tanömō, ba oya göi ibasi danua. Ba balazi dōdō zamōsana; böi abu dōdō, ba tenga ni forege; si no aoha gölö fame'e, da'ō sa zomasi Lowalangi. (II Korindro 9:6-7)

Tafa'ema wasömbata khō Lowalangi, manunō ita moroi ba Mbuku Zinunō **Numero 259**

259. HE SO' AYA SANGORIFI NIHA 1

do = bes 4/4

MM = 88 - 96

1. He So' aya sangorifi niha sondrorogō fa ' aurima.
Mafa ' ema khō-U wasömbatama föfō mbuala-Mō khōma
No buala si sökhi nibè Zo ' aya ba zamati ba dōi Nama.
2. Fahowu' ö fefu halöwōma gasagasa wekolima.
Bè mo' ölö ba molualua, fefu gohitō dōdōma.
Ya tobali sumange ba fangebua Dōi-Mō Keriso So' aya.
3. Dōnisiga ba zorugo Ya'wa, naha nihonogōi Nama.
Me ba da' ö sa mo' ahonoa, zanau' ölö wasöndrata.
Böi tebulō wamati ba fanötōna, irugi ba gamozua.

SA :

Na no awai la'owuloi/lafa'ema wasömbata, ba owulo tanō furi zangowuloi Fasömbata, lafendrongō wolohe föna fasömbata, ba la'o'ö gōfanōwa note zinunō (irama lagu).Fatua lö möi ira wolohe föna, ba imane Sangai Agendre:)

“Da tafasao wasömbatada andre föna Lowalangi,.....Muzizio ita fefu.....
Manunō ita moroi ba Mbuku Zinunō numero 261

261. YA'E ZUMANGE 1

do = d 4/4

MM = 62 - 68

Ira'alawe □

1. Ya ' e zu-ma-nge fa-sömbata, ma ' o-he sumange Yehowa.
Iramatua
Reff: Ma'andrō khō-U fa-ho-wu'ō zu-mange ni 'o- hema khō-Mō
2. Ya'e zumange fasömbata mabe'e soroi ba dōdōma.
Reff: Ma'andrō khō-U
3. Ya'e zumange fasömbata buala si'otarai Nama.
Reff: Ma'andrō khō-U
4. Ya'e zumange fasömbata, boto, noso, ba fa'aurima
Reff: Ma'andrō khō-U
5. Ya'e zumange fasömbata, lö irugi zomasi dōdō-U.
Reff: Ma'andrō khō-U

6. Ya'e zumange fasömbata, ma'aghasi gölö Zo'aya.
Reff : Ma'andrö khö-U

FANGANDRÖ : (*Fangandrö nidönia'ö fasamösa zangowuloi fasömbata, aefa da'ö ba lafa'ema ba Danga zangai huhuo, itema'ö sangai huhuo awena itou'ö ba dete meza. Ba na so Wasömbata si sambua ni'ofulu, owasa wanaru ma owasavwamasi, btn ba itema'ö sangai huhuo si fao taroma Li Lowalangi si faudu ba wasömbata ni'owuloi andrö*) **Mudadao Zato**

9. KOOR/VOKAL GROUP

- SA** : Da tafaogö dödöda ba wanuno Lowalangi faoma sinunö ni'olohesi:
 Koor ba Vokal Group
 a. Koor Jemaat
 b. Kegiatan Komisi Bapak
 c. Kegiatan Sektor I
 d.
 e.

10. MANUNÖ

- SA** : Da tafa'anö dödöda wamondrondrongo taroma Li Lowalangi, manunö ita moroi Ba Mbuku Zinunö **numero 163**

163. UHONOGÖ SIBAI DÖDÖGU

do = a, 4/4

MM = 76 – 82

1. Uhonogö sibai dödögu ba wamondrondrongo li Mö Yesu Mangalulu ndra'odo föna-U ba gametahö-Mö ia da 'a Öbayoini Eheha-U Yesu dozigö mbanua samati khö-U. Ubokai dödögu khö-U Yesu nahia daroma li-U. Taroma li-Mö lö fa'atebulö menewi ma 'ökhö ba si 'ogötö'ö lö sa mamalö. Taroma li-Mö si möi fangabölö utema 'ö soroi ba dödö, tolo ba wolo 'ö.

11. HUHUAO SEBUA

- SH** : Ya'irorogö dödömi, awö gera'erami fa'ohahau dödö andrö, khö Lowalangi, Sabölö moroi ba gera'era niha fefu, ba khö Keriso Yesu. Mangandrö ita.....Yaduhu.
 a. Fombaso taroma Li Lowalangi *Luka / Lukas 21:25-36 (Tuho Migu :Böi Miförö ba Böi Famalö Wangandrö / Berjaga-jaga dan Bedoa Senantiasa)*
 b. Fanuriaigö
 c. Nitanö ba dödö. *Yakobo / Yakobus 5:8 (Ba ya'ami göi, ba mibologö dödömi, mibalobaloi, mi'a'aro'ö dödö, noa sa ahatö wa'aso Zo'aya andrö. / Kamu juga harus bersabar dan harus meneguhkan hatimu, karena kedatangan Tuhan sudah dekat.)*
 d. Fangandrö Fanga'aro'ö huhuo

- SATO** : Manunö : BZ. Numero 154 : 1

154. NO MAFONDRONDRONGO LIU²

do = es 4/4

MM = 96 - 104

1. No mafondrondrongo li-U, Lowalangi So ' aya. Tanö ba dödöma ia, fa böi olifuga. Fahowu 'ö ia khöma, ena ' ö ohahau dödöma fefu. Heta ba dödö zi lö sökhi, ma'o ' ö niwa 'ö-U.

12. TUHO WAMATI

- SA** : Me notarongo daroma Li Lowalangi, ba da tafaogö Lida wamaduhu'ö famatida Ya'ita niha Keriso föna Lowalangi, muzizio ita fefu.....endronga lida

- SA+SATO** : ❖ Ya'o mamati khö Lowalangi Ama si lö ambö fa'abolö, somböi banua si yawa awö danö.

- ❖ Ya'ō mamati Khö Yesu Keriso, So'aya ya'ita, Ono Lowalangi si ha samösa, nitema nina-Nia Maria khö Geheha Ni'amoni'ö, Ono nono alawe Ia, no manaögö huku Ia, barö mbawa Fondrio Filato, teforöfa Ia, mate,ba lako'o. No möi Ia ba mbanua niha tou, no maoso Ia moroi ba ngai zimate me no irugi tölu ngaluo. No manahae Ia, möi ba zorugo, dumadao ba gambölö Lowalangi Ama si lö ambö fa'abölö. I'otarai da'ö mangawuli Ia dania ba wanguhuku niha sauri, awö zi no mate.
- ❖ Ya'ō mamati khö Geheha Ni'amoni'ö, ba ufati ha sambua mbanua ni'amoni'ö, fefu niha Keriso, fa'awösa niha ni'amoni'ö, ba fangefa horö, ba femaoso mboto zimate, ba fa'auri si lö aetu. Yaduhu. (Mudadao zato)

13. ANGOMBAKHATA BA MBANUA NIHA KERISO

SA : Da tafondrondrongo gangombakhata:.....

MANUNÖ

SA : Manunö ita moroi ba Mbuku Zinunö **numero: 47 ayati 1-2**

47. HIZA, TOHARE MESIA

Lala : Mihaogö Lala Mibokai (No. 31)

do = f 3/4

MM = 96 - 104

1. Hiza, tohare Mesia Ono Wondrege Zala'wa.
Solohe khöda fa'auri. Si'otarai Lowalangi.
Sangatulö'ö ya'ita ba samohouni tödöda.
Tasuno Zo'aya samè fa'aurida.
2. Hiza, tohare Mesia, Ono Wondrege Zala'wa.
Da tafa'anö dödöda, ba wanema'ö Ya'ia.
Tödöda zumange-Nia, fanunö wangowai-Nia.
Tasuno Zo'aya, samè fa'aurida.

14. FANGANDRÖ SALAHI + FAMATENGE + HOWUHOWU

SH : Muzizio ita fefu, mangandö ita :.....(tetohugö) : Ba döi Zo'aya ya'aga Yesu Keriso, Si no mamahaö ya'aga ba wangandrö mamane :

SH + SATO : He Ama khöma siso ba zorugo, ya te'amoni'ö döi-U. Ya tobali banua-U fefu niha, Ya itörö zomasi ndra'ugö, hulö ba zorugo, ya si manö göi ba gulidanö. Öma sirugi ma'ökhö be'e khöma ma'ökhö andre. Ba efa'ö khöma horöma, si mane fangefa'öma sala ba zi so sala khöma. Böi ohe ndra'aga ba wanandraigö, efa'öga ba zi lö sökhi. Me ya'ugö zamatörö banua-U, ba sokhö fa'abölö, awö lakhömi, irugi zi lö aetu. Yaduhu

SH : **FAMATENGE + HOWUHOWU** :
Mi'angawuli si fao fa'ohahau dödö, ya tobali ami sura Keriso, samaduhu'ö Ya'Ia ba Lala wa'aurimi sero ma'ökhö, ba mitema (tatema) howuhowu Lowalangi :
❖ Ya mufahowu'ö ami/ita Lowalangi, Ya murorogö ami/ita
❖ Ya mufohaga mbawa-Nia Khömi/khöda, Ya mu'ebua'ö dödö-Nia khömi/Khöda
❖ Ya mufalemba hörö-Nia khömi/khöda, Ya mube'e wa ohahau dödö khömi/khöda fefu. Yaduhu

SATO : Manunö BZ.Numero 471 ayati 1

471. BÖI RÖRÖ' Ö

do = d 2/4

MM = 96 - 104

1. Böi rörö' ö, böi rörö' ö böi rörö' ö, böi rörö' ö, talifusö
Ahatö ginötö, ahatö ginötö, ahatö ginötö, tohare Yesu andrö.
Fa'anö ndra'ugö, röi dödüu sito'ölö.
Lö ödöna-döna na so Yesu andrö.

SH : YA'AHOWU
SATO : YA'AHOWU